

Dem öffnet die Haut mit dem Laß-Eisen/ vnd leget gepulverte Wolffswurk darauff/ lasts beissen.

Dem ist auch gut/ wann mans im Wasser bis an die Knie Abends vnd Morgends stehen läst/ dieses thut/ bis ihr sehet/ daß sie eindorren/ dann gebet ihnen das Fehr/ brennet sie vmb die Gliedmassen/ vnd heylet den Brand/ wie oben gemeldt.

Wann ihr wollet die Floss-Gallen auff fünffzehen Tag verhelen/ daß man sie nit kennet/ wann man aber benachmals das Pferd bemühet/ so kommen sie wider herfür/ darzu kan man nachstehendes Mittel gebrauchen: Nemmet das grüne von Zwifeln/ oder Schnittlach/ stosset sie wol/ trucket den Safft darauff/ vnd bindet solchen Safft sambt dem grünen darüber/ ist gar bewährt.

Von denen Bläslein oder Wasser-Gallen/ wie sie abzuwenden.

Wercket/ wann diese Bläslein/ oder Wasser-Gallen wol zeitig vnd weich seyn/ alsdann reisset sie mit dem Laß-Eisen auff/ trucket sie wol auß/ so werdet ihr ein vermengtes gelbes Wasser sehen heraus fließen: dann sollet ihrs ringsherumb brennen/ in gestalt eines Sporn-Rädleins/ vnd in dessen Mitten gebet ihme mit der Spitze des glüenden Eisens einen Dupffer/ daß es durch die Haut dringet/ vnd der Brand solle so starck seyn/ daß die Haut darvon weiß werde/ dann bestreichets mit Del/ vnd lassets in kein Wasser kommen/ bis zu end neun oder zehen Tag/ so ist es frey/ in dem Del sollen fünff dürre Feigen gesotten seyn/ darmit bestreichets zweymal des Tages/ so heylets auß.

Für die Geschwulsten vnten am Leib.

Wann ein Pferd wegen viler Streich/ vnd Sporn-Stöße/ oder daß es zu fest gegürtet worden/ auch etwann einer andern Ursach wegen/ vnten am Leib geschwollen wäre: rißet mit dem Laß-Eisen gar leis die Geschwulst/ bis das Blut heraus gehet/ dann nemmet Attich-Blätter/ besprizet sie mit warmen Wein/ vnd also warmer bindets auff die Geschwulst/ lassets einen Tag darauff ligen/ dann waschets mit Hönig vnd heißen Wein/ so viel es erleiden kan/ vnd lassets alle Tag Abends vnd Morgends eine Stund an der Hand spaziren führen/ vnd so diese Geschwulst sich fürwerts gegen der Brust ziehen thäte/ ziehet ihme zeitlich ein Haar-Seil/ sonsten möchte es zum Halsen schlagen.

Die